

欽
定
全
唐
文

欽定全唐文卷七百七十七目錄

李商隱 七

爲舍人絳郡公上李相公啟

爲絳郡公上李相公啟

爲絳郡公上史館李相公啟

爲絳郡公上崔相公啟

爲興元裴從事賀封尚書加官啟

爲崔從事寄尚書彭城公啟

爲白從事上陳許李尚書啟

爲東川崔從事謝辟啟

爲東川崔從事謝聘錢啟

爲山南薛從事謝辟啟

爲同州張評事謝辟啟

爲同州張評事謝聘錢啟

爲李貽孫上李相公啟

爲柳珪上京兆公謝辟啟

爲柳珪上京兆公謝衣絹啟

爲柳珪上京兆公謝馬啟

爲張周封上楊相公啟

爲某先輩獻集賢相公啟

爲韓同年瞻上河陽李大夫啟

爲舉人上翰林蕭侍郎啟

爲舉人獻韓郎中琮啟

謝座主魏相公啟

謝宗卿啟

欽定全唐文卷七百七十七

李商隱七

爲舍人絳郡公上李相公啟

某聞量力省躬典刑之深旨度材任事聖哲之良規某雖
甚愚頗嚮斯義屬者謬圖仕進因藉時來伏值相公顧以
外藩夙通襟契憫羊曇之未立早託謝家憐康伯之無歸
常依王氏拔於幽滯處以周行遂俾南憲中臺屢承闕乏
內庭西掖比辱昇遷邁越時流塵污中旨恩渥非次性分
難移徒當侍從之榮莫有論思之效竟使懼因福過疾以

憂成外雖全人中抱美疾常願青蒲瀝懇紫殿披誠進退
未聞過累仍積及正名綸閣收跡翰林尋欲竊候休旬伏
拜蕭屏謝昔年之朝獎抒他日之私誠而機事且繁燮和
少暇齋沐累至肝腸莫從旋屬虜帳夷氛壺關伐叛絳臺
北控有元戎大集之師鄭國東臨過列鎮在行之眾任當
調發事屬供須豈斯擇材皆在非據周旋三郡縣歷兩霜
頒宣詔條祇惕廟畫雖無咎悔亦乏殊功今幸四海無塵
六州嚮化靈臺偃伯衢室歸尊是修明禮律之初舉拔俊
賢之始而鄭之爲地右臨梁苑左倚成皋比之列藩實爲

劇郡山東望族幾同屈景之強洛邑頑民常雜萑蒲之聚
水言出牧豈易其人而又孔道所因使車旁午送迎或闕
則怨譴流詞館餽稍乖則職司貽辱託之金器猶或難居
矧在朽材寧宜久處某伏思自隨宦牒遽忝恩榮位至圭
符寵當金紫或筋骸無苦心志有餘卽豈願踞熊軾以告
勞指隼旗而辭疾直以攝生寡妙舊恙無全儻或形言懼
塵清聽每朝昏改候霧露消威則或至問俗有違在公多
廢坐爲尸祿行有媿顏而又貪明盛之時有婚嫁之累未
敢高論止足直乞退休是以輒疏精誠上干陶冶伏惟相

公雲龍協應舟楫呈功比屋可封期於屈指一夫不獲固
以動心如蒙曲鑒深情猥從志願置之他所以遂其愚則
吳楚列城江關別郡雖居鄰佐亦委緝綏獲安病躬豈敢
擇地猶希磨淬鉛鈍撫養疲羸積以歲時少裨塵路伏惟
試賜恩照圍減帶緩髮稀弁傾窅然向風目極心往下情
無任攀戀感激惶懼之至

爲絳郡公上李相公啟

某少悲羈紲不承師友之親規晚學文章麤致鄉曲之名
譽謬汗官秩遂彰華纓握蘭清曹視草禁掖貪叨過極憂

責非寧蚤爲寒暑所侵頗染肺腸之疾自頃以慶雲結蔭
宸極繫心當就望以推誠於煎調而寡裕前歲伏蒙任使
奉遠承明值朝廷興問罪之師原野有宿兵之餽絳城甚
苦鄭駟非完加之以降虜移鄉仍之以貴臣銜命飛輓之
外將迎實繁旁奉廟謨上尊詔旨動繁調發居勞撫安抱
疾以臨爲日斯久伏幸姦克克又濡澤橫流是大朝黜陟
之初良冶埏鎔之始此郡路通四境名冠六雄軒蓋以來
原野交錯荏蒨有聚武吏貽憂雖清時無杼柚之虞而常
日有逋懸之賦必在假之賢守屬以強材然後謠詠克興

公私不廢豈可使某素兼疴恙本乏良能久於是邦以主東道饋飧將藥甌並進假牒與公案相隨含意不言貪榮是罪相公漢籌始運殷鼎將調度材任官歸於至當存誠愛物決在無頗竊敢自託緘封遠干樽俎俯期恩意以保衰微且某運偶昌期年初知命豈不願臨劇郡稍冀榮途但以力有所不任心有所不逮雖欲勉強實憂傾敗彼吳楚偏鄉非舟車要路永言凋瘵亦藉緝綏儻特降優容遙聞擬議則朽質有報恩之所羸軀收曠位之譏宿疾或痊理劇未晚伏惟試賜裁度嚮風披懇服義陳詞仰台耀以

瞻輝望洪鈞而佇惠于冒尊聽伏積兢惕謹啟

爲絳郡公上史館李相公啟

某啟伏以秉大鈞者以物得其所爲先執大化者以材適於任爲急將以致理在明命官使輕重合宜大小有裕然後人稱其職職無廢人此相公之所明知也某材術素寡聲光莫聞偶叨承平謬登華顯洎分符竹使絕籍金閨一授專城再易灰琯且解巾臨郡前賢攸重一麾出守昔人所榮雖積戀於本朝實俯光於單緒況又此州管叔舊國帝鴻遺墟接彼嶽嶢浸以京索聚山東之右族邇洛表之

宸居內揣非才頗虛信任而復以通莊所自假道攸繁載
惟餞迂之勞實半頒宣之務必屬於壯齒付彼全人用以
責功僅能集事某早年被病晚歲加深衣袴無取於潔清
藩溷動淹於景刻徇己則坐墮物務業官則立致蕭衰欲
俱濟於公私實加憂於寤寐矧茲仍歲適有外虞降卒征
人旬時併集飛芻輓粟星火爲期以此疚心彌深舊恙今
衰瀛大定雨露旁流高步翰飛一呼而至雲羅場藿萬里
無遺將調斯人以求良牧得才爲美今也其時儻蒙允贊
聰明曲聽奏記俯憐哀藹稍賜優容則亦不敢便掛簪纓

遽離陶冶江湖偏郡襦袴須人無根節之難少舟車之會
俾之養理使得便安庶麤致人謠以酬廟算則某所謂材
有稱職時無廢人凡在宦途皆仰時化伏惟試賜恩察違
離漸久刺謁末由昔在孔門常忝四科之列今瞻魯史將
期一字之恩下情無任感戀兢惶之至

爲絳郡公上崔相公啟

某啟某本洛下諸生山東舊族麤霑科第薄涉藝文謬藉
時來因成福遇青纁赤管已忝於清華黃紙紫泥仍參於
宥密相公早容薄伎獲寄光塵別殿朝迴禁林夜直每披

襟素常賜話言知蔣琬之爲公敢矜先見哀馬卿之多病
亦辱來言圭律未遐銘鏤斯在相公鹽梅調味舟楫濟時
晉水擒兇韓都蕩梗以不剛不柔貞百度以無偏無黨定
九流若某者實有何能可叨出牧絳田已非厥任滎波轉
過其材間歲以來爲政非易有南遷之降虜有西出之戎
師資靡所供餽牽之備未嘗造次敢怠躬親今梟獍埽除
馬牛歸放將使坐臻富庶必先用得才能此地名高六雄
實控東道分憂之寄自昔爲榮況在疏蕪敢忘涯分但以
輜軒全至賦貢川流非惟撫字之難兼有送迎之遽舊疴

加甚朽質難堪假故稍頻曠廢爲懼又以宦游旣久故里
多違陶令之田園將蕪向平之婚嫁未畢顧惟羈絆未可
歸休竊敢遠疏丹誠上千清重非獨祈恩於時宰實將誓
款於已知儻蒙以然諾爲心誠明濟物垂憂不逮賜議所
安則吳楚之間郡邑非少不當衝要或異膏腴使之頒條
庶可求瘼昨賊平之後啟事尋成冰霜始嚴筆札未暇又
伏慮內庭展顧稱已推遷外郡寓詞頗乖流品沈吟有日
鬱抑經時今則情素坐煎驅馳行久若猶緘嘿是負陶甄
伏惟曲賜恩鑒誠懸書殿戀積台階比殷浩之空函情同

事異望孫宏之東閣魂往形留下情無任感激攀戀之至
謹啟

爲興元裴從事賀封尚書加官啟

裴卽封之門生

伏承天恩榮加寵秩伏惟感慰伏以蓬果充徒遂爲逋寇
三里霧未能成市五斗米乃欲誘人聯接坤維依憑艮險
蹙跳鋒刃冒觸罽罽尚書四丈機在掌中兵存堂上爰擇
幕府俾帥軍行羊祜理戎輕裘緩帶祭遵臨敵投壺雅歌
一舉而張角師殲再戰而孫恩黨盡長清沴氣永變巫風
雖合勢於三川實先鳴於二子仰惟殊渥允謂簡勞當從

鈴管之榮便執陶釣之柄蒼生之望孰不喁喁某早忝生
徒復叨參佐漢祖以蕭何爲人傑晏子以仲尼爲聖相當
今昌運繫我師門雞樹鳳池不勝心禱無任抃賀之至

爲崔從事寄尚書彭城公啟

福啟福聞崔辭揚館常懷寶篋之恩燕別張巢永結雕梁
之戀推誠況物某有類焉始者尚書晞髮丹山騰身紫府
曉趨清禁則瓊樹一枝夜直皇闈則金釭二人寰莫見
塵路難逢而某志在諱窮勇於求益輒干卑隸自露菲葑
寶肆迴腸只期和氏鑿門投足永念倉公果蒙愍彼顛愚

溢爲品目勾萌始達依周圍以揚翹滴瀝纔分託靈光而
振響輕軒短羽驟化窮鱗每欲陶冶肺肝耕耘筆硯麤調
宮徵以謝陽秋而義有多塗情非一概辭繁轉野意密彌
賒雖塗迨如韓遂之書反覆若葛洪之紙終無髣髴可得
端倪去歲洛陽獲陪良宴頻趨絳帳累坐青氍况聞懇拒
台階請從藩屏舉郗超之幕畫數阮瑀之軍書懸以嘉招
形於善謔何言違阻復積光陰潼水千波巴山萬嶂接漏
天之霧雨隔嶓冢之煙霜皓月圓時樹有何依之鵲悲風
起處巖無不斷之猿煎向義之初心軫懷仁之勁氣竊惟

秦鏡當筵衛桃一昨伏承擁節浚郊建牙隋岸將求捧幣
申好裂裳就塗接枚叟之餘光奉鄒生之末座又伏慮旋
登殷夢俄奉周畋徵詔已行拜塵無及徘徊失措抑鬱誰
聊必也華榻長懸簡書無廢卽割任安之席堪哂無圖負
田叔之鈴可嗟非據伏惟慎安寢膳勉護興居早秉信圭
速調大鼎至於禱祝實倍等倫半菽思貯於神倉一勺願
投於靈海道之云遠更開殷浩之函書不盡言重洒楊朱
之淚攀戀感激不知所裁伏惟俯賜鑒照謹啟

爲白從事上陳許李尚書啟

某啟伏奉公牒辟署節度巡官兼伏奉榮示賜及疋帛等
才異當仁事從非望拜受失度跪捧難勝某符彩無奇局
量有限徒以杜林外氏學富文華謝朗舉宗皆親儒墨齟
年有志壯歲無名瞻遺構以自驚奉成書而未遂重以零
丁屬釁息類非蕃決稚圭之甲科則行有違離之苦效敬
通之卻掃則坐無供養之資徘徊盛時鬱抑衷懇敢思聘
召忽賜降臨尚書分戚天家揚輝王國攻文而丹青讓巧
論兵而鉤銘慙能頃者言自執金雄推受脈河橋三壘當
弟子之輿尸易水一城值將軍之下世功深式過道著綏

和中間衛朔拒君邢洺起亂紀侯去國汾晉挺災語其巢
穴之間在我封鄰之側而又潛調遠轡密運良籌輕敵殘
人則勇於不敢伐謀持重則令在必行今者趙北變風淮
南受賜戎麾始至賓驛初開固合大選英髦以充僚屬豈
期思慮遂及孱微賁帛豐盈寓圭重復慈親喜問孀姊號
驚姓名遂列於羣英簪笏遽光於單緒感深肌骨戴重邱
山未伸投刺之誠已定糜軀之誓伏以久將栖託兼議扶
迎更涉旬時方遂行李漆園之蝶濫入莊周之夢竹林之
蟲永依中散之身蓮幕含誠金臺結想瞻仰恩顧伏撓精

魂謹奉啟陳謝謹啟

爲東川崔從事謝辟啟

福啟伏奉公牒伏蒙辟署觀察巡官某早辱梯媒獲沾科第吳公之薦賈誼未塞前叨竇融之舉班彪仍當後忝仰觀蓮幕俯度桂科卵翼不自他門頂踵實非已物但齎灰粉遠逐旌幢雖有命以酬實無言可謝伏惟俯賜鑒諒

爲東川崔從事謝聘錢啟

福啟錢若干伏蒙賜備行李竊以白馬從軍青鳬受聘磨文難減校貫知多陸賈方驗於火花郭况莫矜於金穴感

戴之至不任下情謹啟

爲山南薛從事謝辟啟

傑遜啟今月某日伏蒙辟奏節度掌書記敕下徒有長裾
曾無綵筆初疑誤聽久乃知歸感激慚惶不知所喻某受
天和氣而鮮雄才幸承舊族之華遂竊名場之價頃者湮
淪孤賤絲隔音塵其後從事梓潼經塗天漢初筵末席披
霧覩天自爾以來懷恩莫極鄭元之腰腹若掛丹青崔炎
之鬚眉常存夢寐方思捧持杖屨廁列生徒豈望便上仙
舟遽塵蓮府尚書士林圭臬翰苑龜龍方殿大藩將求記

室是才子懸心之地詞人效命之秋豈伊疎蕪堪此選擢
思曾顏之供養念陳阮之才華自公及私終榮且忝伏以
家室憂繁初解山川跋涉未任須至季秋方離上國撫躬
泣下尚遙郭隗之門閉目夢遊已入孔融之座下情無任
攀戀銘鏤之至

爲同州張評事謝辟啟

潛啟伏奉榮示伏蒙猥賜奏署今月某日敕旨授官承命
恐惶不知所措某文乖綺繡學乏縑緗負米東郊止勤色
養獻書北闕未奉明恩撫京洛之塵素衣穿穴訪江湖之

路白髮徘徊大夫榮自山陽來臨沙苑固以室盈東箭門
咽南金豈謂搜揚乃加屏眇府稱蓮沼慚無倚馬之能地
號雲門竊有化龍之勢便居帷幄遽別蓬蒿袁生有望於
樵蘇楚子永辭於籃縷刻諸肌骨知所依歸伏惟特賜鑒
察謹啟

爲同州張評事謝聘錢啟

潛啟錢若干伏蒙仁恩賜備行李重非半兩輕異五銖子
母相權飢寒頓解細看銅郭徐憶牙籌雖云神有魯褻便
恐癖如和嶠辦裘無闕通刺有期感戴之誠不知所喻謹

啟

爲李貽孫上李相公啟

月日從姪某官某謹齋沐裁誠著於啟事跪授僕者上獻
於司徒相國叔父閣下某伏遠牆藩亟踰年籥抱徽音於
故器雖賞逐時遷竊餘潤於奧雲亦情由類至中阿弭節
末路增懷沈吟易失之時悵望難邀之會石崇著引徒願
思歸殷浩裁書其如慕義伏惟相公丹青元化冠蓋中州
羣生指南命代先覺語姬朝之舊族莊武慚顏敘漢代之
名門韋平掩耀將鄰三紀克佐五君動著嘉猷行留故事

陶冶於無形之外優游於不宰之中始者主上以代邸承
基瑯琊纘業明發不寐懷清廟之景靈日晏忘飧念蒼生
之定命爰徵元老允在賓臣五載於茲六符斯炳頃單于
故境獯鬻遺疆屢緣喪荒亟致攜貳夙沙自縛其主冒頓
忍射其親遂去北邊欲事南牧旣赫斯而貽怒乃密勿以
陳謀管氏將來屢發新柴之井留侯每入便聞借箸之籌
羣帥受成中樞獨運前軍露板方事於羽馳清禁壽觴旋
聞於月捷仍其貴種慕我華風或辨姓寫誠推諸右校或
釋兵伏羲列在周廬潞子離狄而春秋書徐夷朝周而大

雅詠其餘鷹驚鳥散風去雨還亘絕幕以銷魂委窮沙而
喪膽胡琴公主已出於檐檻毳幕天驕行遺其渾酪向若
非薛公料敵先陳三策充國爲學盡通四夷則何以雪高
廟稱臣之羞全肅宗復京之好此廟戰之功一也惟彼參
伐實興皇家天漢美名方之尚陋春陵王氣比此非多而
物眾藏姦地寬長孽敢起在行之眾因興逐帥之謀遂使
起義堂邊台臣夙駕晉陽宮下逆豎宵奔翻勢將冀於連
雞勇鬪尚同於困獸詎知長算已出奇兵金僕靈鉅靡留
於旬朔復興貫木已集於都街此廟戰之功二也潞寇不

懲兩豎之克徒恃三軍之力于我王略據其父封袁熙因
累葉之資衛朔拒大君之詔人將自棄鬼得而誅蛙覺井
寬蟻言樹大招延輕險曾微吳國之錢藏匿罪亡又乏江
陵之粟所謀者河朔遺事所恃者巖險偷生今則趙魏俱
攻燕齊併入奉規於帷幙遵命於指蹤亞夫拒吳驚東南
而備西北韓信擊魏熾臨晉而渡夏陽百道無飛走之虞
一縷見傾危之勢計其反接當不踰時是則陳曲逆之六
奇翻成屑屑葛武侯之八陣更覺區區此廟戰之功三也
三寇殄滅萬方率同將盪海騰區夷山拓宇高待泥金之

禮雄專瘞玉之辭煙閣傳形革車就國盡人臣之極分煥
今古之高名况又奉以嘉聲諧茲國檢關文賜糗遠箴醉
飽之徒晏子朝衣橫勵輕肥之俗比周息慮孤介歸仁紹
續勲家扶持舊族罔容私謝皆事公言景風至而慶賞先
行仲呂協而賢良必遂豈直杜伯山之令子大邑傳家陶
彭澤之孤孫西曹受署重以心游書囿思託文林提枹於
絕藝之場班揚掃地鞠旅於無前之敵江鮑輿尸故矯枉
則黃冶之賦興游道則知止之篇作辭窮體物律變登高
文星留伏於筆間綵鳳翱翔於夢裏此固談揚絕意倣效

何階若某者徒預宗盟早塵清鑒而行藏遷貿岐路差池
今將抽實吐誠推心敘款緘猶未寫詞已失煩某爰自弱
齡實標孤操寒郊映雪暑草搜螢雖有謝於天姿或無慚
於力學庾持奇字信未皆通敬禮小文頗常留意太和中
敢揚微抱竊獻短章方候明誅忽蒙復命荊州一紙河東
百金叨延月旦之評長積竹林之戀竟以事將願背蹇與
身期離索每多交攀莫遂武陵被病洛表求醫未及上言
先蒙受代肩輿而至杜門以居蓬藿荒涼風霜迅厲今已
稍痊美疢獲託休辰殷鉤體羸尚能爲郡馬卿疾罷猶可

言文退無井臼之資進乏交朋之助是以徘徊軒幄託附
緘封冀陳蔡之及門庶江黃之列會敢渝孤直仰累清光
東浪驚年西颺結欬矢心佩賜畢命銜輝道阻且躋書不
盡意金楹假蔭望同相賀之禽珠岸迴光庶及不枯之草
明懸肝膽唯所鑪錘干冒尊嚴伏用兢灼謹啟

爲柳珪上京兆公謝辟啟

某啟散兵馬使陳朗至伏奉榮示兼奉公牒伏蒙召署攝
成都府參軍充安撫巡官者師襄鼓缶或近翫人和氏搜
珉能無驚物跪受高命莫知所裁某藏豹不堅雕龍未巧

徒承庭訓遂廁人曹比衛家之一兒天懸鵬鷁望鄴中之
七子風逸馬牛已忝決科敢思筮仕伏惟相公以仁義禮
智信爲基構用溫良恭儉讓爲藩籬堯時則業貫夔龍殷
代則道符尹說入秉文教出曜兵權揮神鋒而劍合陰陽
述雅誥而筆開造化況天有井絡地稱坤維控三巴百濮
之雄帶南詔西山之險人稱輿府帝謂殊藩固已廣集英
豪用資參佐玳簪珠履綠水紅蓮成籍籍於淮山致憧憧
於燕路若某者徒將慕藺何足望回又安敢拂其塵埃加
以冠履伏思相公直以大人頃居班列獲奉恩私羅照乘

於驪淵覬歸昌於鳳穴未見其可處之不疑曾不念木朽
石頑雕鐫莫就榆瞑豆重性分難移古人所以有以榮爲
憂受恩如敵斯言之作珪也有焉今月六日辰時輒奉辟
書具聞晨省仰承嚴旨便定行期而又內奮弟兄外誘交
友傳翼類虎生角如麟事誠實於顯榮勢莫知其報效但
須旬日方拜旌旄當洗心爲齋延頸以望持千尋之建木
想像瓌姿周萬傾之澄波比量曠度戴恩揣已投命依仁
神之聽之百生如一謹啟

爲柳珪上京兆公謝衣絹啟

某啟伏蒙榮示賜及前件衣服段及束絹等謹依處分捧
受訖伏以大人自處通班彌修儉德田園惟恐蕪沒子弟
不免飢寒去春成名首秋歸覲雖才非張載未刊劍閣之
銘而志慕胡威敢問荊州之絹豈意相公復以簡書召署
筐篚加恩古者贖百里奚纔持五穀謂程不識猶惜一錢
况某碌碌無奇容容自守敢邀厚幣來自雄藩品目難名
珍纖可玩仰李膺之德尚未登門讀戴聖之書已驚潤屋
下情無任戴荷悚懼之至謹啟

爲柳珪上京兆公謝馬啟

金匱要略卷之二十一
某啟伏奉榮示令將前件馬及行官延接者某將仕大藩
苦無遠道得蒙恩禮曲賜優崇扶以武夫濟之良馬經過
燕館將耀於鳴騶夢寐梁園只思於飛輶感佩之至不任
下情謹啟

爲張周封上楊相公啟

某啟某聞不祥之金大冶所惡自銜之士明時不容斯實
格言足爲垂訓然或顧逢伯樂但伏鹽車聽屬鍾期不調
綠綺皋壤搖落老大傷悲同劉勝之寒蟬效子綦之枯木
則亦跡歸棄世行闕揚名某價乏琳琅譽輕鄉曲麤沾科

第薄涉藝文，雖不穎於囊中，水竟深於山上。淹留侯國，祇事戎麾，插羽佩鞬，從相公於關右，束書載筆，隨校尉於河源。自北徂南，已秋復夏，心驚於急絃，勁矢目斷於高足。要津而又永念，敝廬空餘喬木。山中桂樹，遠媿於幽人；日暮柴車，莫追於傲吏。捋鬚理鬢，霜雪呈姿；弔影颺音，煙霞絕想。徒以相公遠敦世故，容在恩門；存趙氏之孤，受梁王之禮。竽將濫吹，石有參瓊，咳唾隨風，眄睠成飾。追維疇曩，曾是逢迎。蜀郡登文翁之堂，上國醉曹參之酒，吹噓盡力，撫愛形顏。雖以捧承，莫能銜戴。況許之高選，光彼宦情；以曲

臺之任用猶輕憲署之發揮方盛仍期官牒不越歲時今則節邁白藏候臨元律燕雖戀主馬亦嘶風郭伋還州尚不欺於童子文侯校獵寧爽約於虞人苟四時之信是孚亦一諾之恩斯及况自元和以後公侯冢嗣卿士子孫與之同時歷然可數莫不翔踰鳥道泳出龍津或並命南臺或迭居青瑣金朱照耀軒蓋追隨某雖忝伊人亦惟華胄比王謝之子弟誠有重輕在嵇呂之交朋宿常連接而獨分光鄰女貸潤監河野鶴天麟絕比倫於朝右髯參短簿困擬議於軍前竊聽重言常與深嘆是以願馳蹇步誓奉

光塵儻或廁錯薪之斯翹詠歸蕞之自牧少窺上路試睨
重霄擊水三千慙隨鵬運澄流十二免使魚勞猶能贊敘
變調謳歌鎔範庶無雅拜以累於君公不使繁聲見憂於
仲子心懷台席夢結邊城寓尺牘而畏達空函寫丹誠而
慙非健筆仰望恩顧下情無任攀戀感激惶懼之至

爲某先輩獻集賢相公啟

某啟某竊覩貞觀朝書伏見文皇帝因夢吹塵方求風后
於畋問卜始載磻溪事偉於王圖道光於帝載下惟敷衽
上則虛襟纏綿圖緯之前窈窕天人之際崇基立極四足

雖斷於神鼇開物成功七竅仍沾於混沌禹羞乘橈舜恥彈琴白鳥已見於將雛朱草仍聞於滯穗共工蚩尤之輩與貳負同拘豕韋晉耳之徒與七駟共御是以今上以貽謀負宸相公以餘慶持衡用十一德之資贊七百年之祚古猶今也仁豈遠乎伏惟相公日觀同光天球並價揚鋒露鍔則武庫常開散藻摘華則文星鎮見一言悟主三接承恩季孟伊繇友朋蕭邴漢皇發論十萬常媿於淮陰齊后推誠一二皆歸於仲父百度旣已貞矣九流又復清焉牆東竈北隱淪者咸欲呈材猿飲鳥言僻陋者皆思入貢

莊生獻臂楊子拔毛三百篇之詩更無諷刺二百年之史
永絕譏嫌斯乃百代可知一言以蔽豈立錐側管可折齒
尋環巍乎煥乎盛矣美矣若某者剖心寡竅對面多牆小
比焦螟敢矜巢窟微同觸氏寧務戰爭徒以簪紱承家階
庭受訓堂中得桂已有前叨幕下開蓮仍當後忝所宜括
囊無咎綵服爲榮絕方朔之上書罷襴衡之投刺直以措
心賢路誓志昌時旣慕義無窮思有道則見伏惟相公霧
能蔚豹雷可燒龍爲百氏之指南作九州之木鐸任安彥
國已在於廢中揚子馬卿並歸於門下而猶渴飢未副影

響無寧請客者不解衾裯當關者空存皮骨此某所以淮
山遠至漢棧斯來望姬旦之吐飧冀張華之倒屣以昇堂
客衆擁簪人多苟無醜蔑之言難佐仲宣之陋今輒以常
所著文若干首上獻伏惟少迴巖電微駐台星固無望於
討論庶或觀於指趣儻蕭稂可刈管蒯無遺蒙文宣一字
之褒得元晏三都之序便若神巫去厲司命添年禱祝之
誠造次於是門遙閭闔路隔瀛洲於人世存思空移氣序
以塵中仰望未見端倪希陪上士之流終預羣仙之末祈
恩望德乃百斯生于冒威嚴下情無任惶懼感激之至謹

啟

爲韓同年瞻上河陽李大夫啟

某啟某材術空虛行能無取因緣慰薦蒙記姓名劉宏一
紙之榮方斯未重季布百金之諾比此猶輕昨者李涿侍
御北來又蒙降以重言將之厚意望輝光而便同簪履在
負荷而何啻邱山况某婚姻早聯門館外舅以列藩之故
家人延自出之恩重疊依投綢繆顧遇東牀坦腹早以媿
於郝公朱邸曳裾復欲階於謝掾儻復清風時至丹慊獲
申實於生前識其死所伏希恩答謹啟

爲舉人上翰林蕭侍郎啟

某啟某聞師曠之琴不鼓之則無以召元鶴楊羲之石不用之卽無以聘應龍物既有之言亦猶是伏惟侍郎學士細縕降秀翕闢資華天上比方但有文星麤爾人間擬議未將太華爲然爰自妙齡遂肩名輩當時人物何戢惟效於褚公邇日風流杜又難方於衛玠加以宏成與石郭璞傳毫渙水倘來皆逢藻績荆峯若至只有瑯琳合沓縑緗縱橫筆硯三都作序不勞皇甫士安萬乘爲寮只有東方曼倩况從近歲且有外虞傳介子在樓蘭國中奇功未就

班仲升於玉門關外報命猶賒雖太平之業已隆而震耀之威尚作侍郎又綢繆武帳密勿皇圖九天九地之兵寧因舊學七縱七擒之術固已元通用視草之工解按劍之怒手爲天馬心繪國圖九重之中斂煩前箸萬里之外輒散衡車位誠在於論思功已參於鎮撫圖書之府鼎鼎之司伊咎懸遺恨之誠夔說貯妨賢之媿載惟後命夫豈踰時抑某又聞之昔管仲經邦賓客有二周公待士吐握皆三丙丞相之車茵寧彈醉客平津侯之賓館不礙布衣並脂粉簡編冠纓圖史後之披卷皆若升堂侍郎美譽旁流

高節彌折擔簦者成市躡蹻者如雲此乃前賢後賢不殊
軌轍往哲來哲非異門牆縱燕有黃金之臺齊爲碣石之
館料其棟宇必已荒蕪若某者陋若左思醜同王粲鬚眉
不及於崔爰腰腹無預於鄭元若值庭蘭固多慙德如逢
巖電不望齊名重以惠劣禰生專非董氏殊顏回之易鑄
若宰我之難雕徒欲萬卷咸披且乏五行俱下叨從歲賦
勉致文編戶戶醬瓿唯聞見辱人人蓋曰不肯留題再困
於魚登一慚於雁序

其長兄兩
舉及第

然天付直氣家傳義方雖

在顓蒙不苟述作廣絕交之論抑有旨焉移太常之書非

無爲也頃者曾干闥侍獲拜堂皇旣容納之有加遂希望
之滋甚爾後以毛傷垣彈鱗損任鉤拔刺不遷噉喁無暇
旣乖受教便以經時今孝秀爰來風霜已積秦人屢出自
欲焚舟楚卒數奔誰教拔旆是以更持魚目當夜肆以沽
諸復挈豚蹄祝天時之未已義誠多媿志亦可憐倘蒙猶
枉鉛華更施丹雘俾其恩地不在他門雖不及采椽備枝
梧於大廈亦庶乎稊米增流衍於神倉與夫九九之能猶
或萬萬相遠誠深詞切聲急響煩仰郭泰之龜龍望仲尼
之日月濡毫伏紙億萬常心干冒尊嚴伏用戰灼謹啟

爲舉人獻韓郎中琮啟

某啟某少承嚴訓早學古文非聖之書未嘗關慮論都之
賦頗亦留神徒以不授彩毫未吞瑞鳥馳名江左陸機莫
及於才多擅譽鄴中王粲終聞於體弱上下羣士差池累
年頃者輒露疎蕪不思狂簡捧燭火以干日御動已光銷
抱布鼓以詣雷門忽然聲寢不謂郎中授材路廣登客門
寬望犬附書冀雞談易特垂題目曲賜丹青旋屬榮藩從
行神州視膳同孟陽之覲蜀比孝若之歸齊雖佩恩私竟
乖陳謝光陰荏苒誠抱勤拳今此秋期遂有天幸更奉禰

衡之刺敢無駸蔑之言某在京多時自夏有疾失外郡薦
名之限俯神皋試士之期物情既集於宗師公選果歸於
令季懷材者皆云道泰抱器者自謂時來以卞和爲玉人
無不收之瓊玖得蹇修爲媒氏無不嫁之娉婷是以願託
一拳潛布百兩顧方流而有託慮良會之猶賒伏惟郎中
與先輩賢弟價重兩劉譽高二陸比李膺則仙舟對棹方
馬融則絳帳雙褰若某者雖陋若左思瘦同沈約無庾信
之腰腹乏崔旻之鬚眉然至於感分識歸銜誠議報將酬
楊寶則就雀求環欲答孔愉則從龜覓印推其異類不後

金定石月三
卷一百一十二
他人謹復軸新文重千清鑒馬卿室邇孔子牆高遲面莫
由隳肝無所任重道遠方懷驥坂之長鳴一日三秋空詠
馬嵬之清什知深可恃言切成煩幽谷未見於鶯喬曲沼
空勤於鳧藻仰瞻几閣伏待簡書謹啟

謝座主魏相公啟

爲弟作

義叟啟伏奉前月二十八日敕旨授秘書省校書郎知宗
正表疏續奉今月五日敕改授河南府參軍依前充職者
小宗伯之取士早辱搜揚大宗正之薦賢又蒙抽擢未淹
旬日再授班資任重本枝職齊載筆方殊王逸惟注楚辭

有異郝隆但攻蠻語此皆相公事均卯翼勢作風雲特於
汨沒之中俯借扶搖之便孔龜效印未議於酬恩楊雀銜
環徒聞於報惠感忭之至罔知所裁謹啟

謝宗卿啟

爲弟作

義叟啟伏蒙奏署知表疏官伏奉前月二十八日敕旨授
祕書省校書郎續奉今日五日敕改授河南府參軍者某
少實艱屯長無才術徒以與周同姓從魯諸儒託阮籍之
竹林攀郗詵之桂樹曲蒙題目猥被薦聞惟我大朝克崇
宗祏敘文昭武穆之位敦紹堯纘禹之親豈以斯文失於

欽定全唐文

卷七百七十七

李商隱

五

能者況一蒙旌錄再忝恩榮班資將廁於郗超職業幾踰
於孫楚感結所至死生以之卽以今月某日發赴所職登
門在近縮地是思惟勒肺肝恨無毛羽伏惟特賜恩答謹
啟

欽定全唐文卷七百七十八目錄

李商隱八

獻相國京兆公啟

獻相國京兆公啟

賀相國汝南公啟

上兵部相公啟

賀崔相公轉戶部尚書啟

上時相啟

獻襄陽盧尚書啟

上河東公啟

上河東公第二啟

上河東公第三啟

上河東公謝辟啟

上河東公謝聘錢啟

謝河東公和詩啟

上尚書范陽公啟

上尚書范陽公第二啟

上尚書范陽公第三啟

獻侍郎鉅鹿公啟

獻華州周大夫十三丈啟

謝鄧州周舍人啟

獻舍人彭城公啟

獻舍人河東公啟

端午日上所知劍啟

端午日上所知衣服啟

爲濮陽公涇原署營田副使賓牒

爲濮陽公補保定尉張鳴巡官牒

爲濮陽公陳許補王琛衙前兵馬使牒

爲濮陽公補盧處恭牒

爲濮陽公補仇坦牒

爲濮陽公補顧思言牒

爲滎陽公桂州署防禦等官牒

欽定全唐文卷七百七十八

李商隱

八

獻相國京兆公啟

某啟人稟五行之秀備七情之動必有詠歎以通性靈故
陰慘陽舒其塗不一安樂哀思厥源數千遠則鄘邶曹齊
以揚領袖近則蘇李顏謝用極菁華嘈噴而鐘鼓在懸煥
爛而錦繡入翫刺時見志各有取焉某爰自弱齡側聞古
義留連薄宦感念離羣東至泰山空吟梁父南遊郢澤徒
和陽春游於自得之場實竊德音之選伏惟相公既康大

政復振斯文論風雨則秋枿芬華語霜霰則春條零落發
輒於風力解鞍於伊咎宮商資正始之音寒暑協中和之
序是故贊其纓拾俟彼斧斤神氣雖怯於大巫名字願聞
於下客舊詩一百首謹封如別延之設問希鮑昭之一言
何遜著名繫沈約之三讀千冒嚴重延望恩輝進退之間
若據泉谷伏惟俯賜容納謹啟

獻相國京兆公啟

某啟昔師曠薦音元鶴下舞后夔作樂丹鳳來儀是則師
曠之絲桐以元鶴知妙后夔之金石以丹鳳彰能然而師

曠之前撫檄軫者不少后夔之後諧律呂者至多曾不聞
元鶴每來丹鳳常至豈鳴臯藻質或有所私巢閣靈心不
能無黨以今慮古愚竊疑焉伏惟相公正始敦風中和執
德衛玠談道當海內之風流張華聚書見天下之奇祕自
頃出持戎律入踐台司暗合孫吳乃山濤餘力自比管樂
亦孔明戲言斯皆盡紀朝經全操樂職雖魯庭更僕魏館
易衣欲盡揄揚終成漏畧而復調元氣之暇居外相之餘
偃仰縑緇留連章句亦師曠之元鶴后夔之丹鳳不疑矣
若某者幼常刻苦長實流離鄉舉三年纔霑下第宦遊十

載未過上農顧筐篚以生塵念機關而將蠹其或綺霞牽
思珪月當情烏鵲繞枝芙蓉出水平子四愁之日休文八
詠之辰縱時有斐然終乖作者去前月二十四日誤干英
眴輒露微才八十首之寓懷幽情罕備三十篇之擬古商
較全疎過豐隆以操槌對西子以窺鏡比其濶畧仍未等
倫然猶斧藻是思丹青不足亟揮柔翰屢贊神鋒詎成褒
德之詞自是抒情之日言無萬一讀有再三不謂恕以蕭
稂加之金鰲頻開莊驛累泛融尊揖西園之上賓必稱佳
句攜東山之妙妓或配新聲是以疑元鶴之有私意丹鳳

之猶黨者蓋在此也始榮攀奉俄歎艱屯以樂廣之清羸
披揚雄之癡眩遥煩攻療旋曠趨承遊梁苑以無期窺漳
濱而有日矧以游丁鰥子不忍羈孤期旣迫於從公力遂
乖於攜幼安仁揮涕奉倩傷神男小於嵇康之男女幼於
蔡邕之女每蒙顧問必降咨嗟撫身世以知歸望門墻而
益懇當今允推常武將慶休辰軒后之憶先鴻殷帝之思
盤說詳觀天意取在坤維弼光宅之功議置器之所載求
列辟誰取抗衡愚此際儻必辨杯蛇不驚牀蟻尚冀從下
執事爲太平民望謝傅之蒲葵詠召公之棠樹恭惟慎調

寢膳克副人祇伏恐本府已有追符卽日徑須上路倚大
夏之節杖入彭澤之籃輿不復拾級賓階致辭公府故欲
仰青田之敘感瞻丹穴以興懷禿逸少之鹿毛書情莫竭
盡休明之璽紙寫戀難窮企望旌幢無任隕淚感激之至
謹啟

賀相國汝南公啟

某啟日者慶屬中興運推常武仰窺金版遐考瑤圖順祖
之孝思丹青曾閔憲皇之功烈刀机彭韋聖上初九潛泉
登三佩契以后稷岐嶷爲小慧故人莫得知以漢皇雲物

爲下祥故神無所豫洎陟元后洪維長君固必降非常之人輔維新之政伏惟閭下昭回降彩沆瀣融精往執靈鈺正星辰之分野今調鏤鼎猶日月之得天昔軒后師臣成王畏相殷奉伊尹則謂之元聖周事呂尚則命爲太公此王者之所以尊賢傑而不以爲疑也至於姬旦金縢不與燕召同列仲尼麟史不令游夏措辭甘盤尊舊學之名夷吾居仲父之位此又賢傑之所以自負其道而不以爲讓也上下交感人祇協從是我后夷姦秉哲之辰實閭下宰物匡時之日清廟係心蒼生延首允也無間樂哉惟時某

早奉輝光常蒙咳唾牛心致譽麈尾交談而契濶十年流
離萬里扶風歌則劉琨抱膝白頭吟則鮑昭撫膺重至門
闥空餘皮骨方從初服無補大鈞穿履敝衣正同北郭槁
項黃馘乃類曹商未知伏謁之期徒切太平之賀下情無
任抃舞踴躍之至謹啟

上兵部相公啟

商隱啟伏奉指命令書元和中太清宮寄張相公舊詩上
石者昨一日書訖伏以賦曠代之清詞宣當時之重德昔
以道均稷契始染江毫今幸慶襲韋平仍鐫宋石依於櫳

井蹈彼椒牆扶持固在於神明悠久必同於天地况惟菲
陋早預生徒仰夫子之文章曾無具體辱郎君之謙下尚
遣濡翰空塵寡和之音素乏入神之妙恩長感集格鈍慚
深但恐涕洟終斑琬爰下情無任戰汗之至

賀崔相公轉戶部尚書啟

伏見某月日恩制伏承榮加寵命伏以聖上能順考古道
相公以浚明有家夜思晝行則裴安之每念王室柔遠能
邇則吳漢之不離公門躬贊休辰首獻明號克宣天澤榮
轉地官擾周禮之兆人選同農父寬虞書之五教任比司

金定全居
卷之二十一
三
徒宗社降輝華夷快望况某叨蒙任使早被恩知未期黃閣之趨預祝緇衣之美抃賀瞻戀不任下情

上時相啟

商隱啟暮春之初甘澤承降既聞霑足又欲開晴實關燮和克致豐阜繁陰初合則傳說爲霖媚景將開則趙衰呈日獲依恩養定見昇平絕路左之喘牛用驚丙吉無廐中之惡馬以役任安偃仰興居惟有歌詠瞻仰闡闡不勝肺肝謹啟

獻襄陽盧尚書啟

伏蒙仁恩賜及前件衣服疋段漆器等謹依榮示捧領訖
衣雜綵繒重輝婁裼器兼丹漆載耀顏瓢悚載之誠不任
陳謝昨日伏奉榮示猥以拙製形於重言夫廣野之氣或
成宮闕擊轂之音有中風雅蓋其偶會豈曰必然又安足
介竈慎之仰占動夔牙之傾聽三兄尚書早貞文律久味
道腴永惟一字之褒便是百生之慶昨晚又復蒙遠遣軍
吏重降手筆揄揚轉極撫納茲深某爰自弱齡叨從名輩
遭廻二紀慶弔一空詞苑招魂文場出涕重膺疊翮零落
無遺高幹修條凋摧畧盡乘風匪順無水憂沉豈謂窮塗

再逢哲匠昇堂辱顧披卷交談不獨垂之空言屬又存之
真蹟爰增懦氣載動初心庶或武陵之溪微接桃源之境
平昌之井暗通荆水之津况異物以達誠弭中阿而攀德
南嚮旌旆實所知歸

上河東公啟

商隱啟兩日前於張評事處伏觀手筆兼評事傳指意於
樂籍中賜一人以備紉補某悼傷以來光陰未幾梧桐半
死方有述哀靈光獨存且兼多病眷言息允不暇提攜或
小於叔夜之男或幼於伯喈之女檢庾信荀娘之啟常有

酸辛詠陶潛通子之詩每嗟漂泊所賴因依德宇馳驟府
庭方思效命旌旄不敢載懷鄉土錦茵象榻石館金臺入
則陪奉光塵出則揣摩鉛鈍兼之早歲志在元門及到此
都更敦夙契自安衰薄微得端倪至於南國妖姬叢臺妙
妓雖有涉於篇什實不接於風流況張懿仙本是無雙曾
來獨立旣從上將又託英寮汲縣勒銘方依崔瑗漢庭曳
履猶憶鄭崇寧復河裏飛星雲間墮月窺西家之宋玉恨
東舍之王昌誠出恩私非所宜稱伏惟克從至願賜寢前
言使國人盡保展禽酒肆不疑阮籍則恩優之理何以加

焉干冒尊嚴伏用惶灼謹啟

上河東公第二啟

商隱啟某聞周朝貝葉列妙引於王褒梁日枳園灑芳詞
於沈約必資乎鴻筆麗藻刻乎貞金翠珉然後可以充足
人天發揮龍象苟其曖昧卽匪莊嚴爰託亨塗夙聞妙喻
雖從幕府常在道場猶恨出俗情微破邪功少二百日斷
酒有謝蕭綱十一年長齋多慚王奂仰戀東閣未歸西林
近者財俸有餘津梁是念適依勝絕微復經營伏以妙法
蓮華經者諸經中王最尊最勝始自童幼常所護持或公

幹漳濱有時疾爾或謝安海上此日風波恍惚之間感驗
非少今年于此州長平山慧義精舍經藏院特剏石壁五
間金字勒上件經七卷旣成勝果思託妙音伏惟尚書有
夫子之文章備如來之行願不逢惠遠已飛廬岳之書未
見簡棲便制頭陀之頌是故右繞三匝仰希一言庶使鵝
殿增輝龍宮發色流傳沙界震動風輪報恩于蓮目果脣
奪美于江毫蔡絹伏希道念特降神鋒瞻望旌幢攜持礎
斧曝身晞髮以候還辭無任懇迫之至謹啟

上河東公第三啟

商隱啟伏奉榮示伏蒙仁恩賜撰金字法華經記一首正
冠薦笏跪捧伏讀聽儀鳳之簫管祇恐曲終對仙客之棋
枰仍憂路盡欣榮羨慕造次失常前者爰託翠珉將翻貝
夾方資護念羸冀標題換骨惟望於一丸剗身止求于半
偈豈謂尚書載持夢筆仰拂文星入不二法門住第一義
諦儒童菩薩始作仲尼金粟如來方爲摩詰鋪舒于無上
藻輝于至真而又以七喻之微較五常之要昭然合契永
矣同塗旣令弟子言詩又與聲聞受記一佛出世萬人所
望不知孱微何以負荷便當刻之鳥篆置彼龍宮此則吹

之以宋玉之風照之以謝莊之月彼則傳之於赤髭疏主
示之以白足禪師然後負簞趨門前騶入廡以鉗奴爲歡
友與車御爲良朋冀必從公以謝嘉命過此而往不知所
圖下情無任距躍感激歡喜信受之至謹啟

上河東公謝辟啟

商隱啟伏奉手筆猥賜奏署某少而孱繭長則艱屯有志
爲文無資就學雖雜賦八首或庶于馬遷而讀書五車遠
慙于惠子契濶湖嶺淒涼路岐罕遇心知多逢皮相昔魯
人以仲尼爲佞淮陰以韓信爲怯聖哲且猶如此尋常安

能免乎是以艮背却行冰心自處羅含蘭菊仲蔚蓬蒿見
芳草則怨王孫之不歸撫高松則歎大夫之虛位不可終
否屬于高明伏惟尚書春日同和秋霜共烈叔子則九代
清德稚春則七葉素儒君子立言永爲周禮正人得位長
作歲星今者初陟將壇始敷賓席射洪奧壤潼水名都俗
擅繁華地多材雋指巴西則民皆譙秀訪臨邛則客有相
如舉纖繳以下冥鴻執定鏡而求西子惟所指命便爲丹
青若某者又安可眩露短材叨塵記室鹽車款段徒逢伯
樂而鳴土鼓迂疎恐致文侯之卧承命知忝撫懷自驚終

無喻蜀之能但誓依劉之願未獲謁謝下情無任感激攀戀之至謹啟

上河東公謝聘錢啟

某啟伏蒙示及賜錢三十五萬以備行李謹依榮示捧領訖伏以古求良材必有禮幣一束芻皆堪貺美五穀皮未曰輕齋况某跡忝諸生名非前哲尚遙玉帳已賚金錢訪蜀郡之卜人懸之莫竭遇河間之姁女數且難窮未草檄以愈風不執鞭而獲富敢將潤屋且以騰裝戴荷之誠寄喻無地

謝河東公和詩啟

商隱啟某前因假日出次西溪旣惜斜陽聊裁短什蓋以徘徊勝境顧慕佳辰爲芳草以怨王孫借美人以喻君子思將玳瑁爲逸少裝書願把珊瑚與徐陵架筆斐然而作曾無足觀不知誰何仰達尊重果煩屬和彌復兢惶某曾讀隋書見楊越公地處親賢才兼文武每舒繡錦必播管絃當時與之握手言情披襟得侶者惟薛道衡一人而已及觀其唱和乃數百篇力均聲同德隣義比彼若陳葛天氏之舞此乃引穆天子之歌彼若言太華三峯此必曰潯

陽九派神功古跡皆應物無疲地理人名亦爭承不闕後
來酬唱罕繼聲塵常以斯風望於哲匠豈知今日屬在所
天坐席行衣分爲七覆煙花魚鳥置作五衝詎能狎晉之
盟實見取郇之易不以釁鼓惠莫大焉恐懼交縈投措無
地來日專冀謁謝伏惟鑒察謹啟

上尚書范陽公啟

某啟仰蒙仁恩俯賜手筆將虛右席以召下材承命恐惶
不知所措某幸承舊族蚤預儒林鄴下詞人夙蒙推獎洛
陽才子濫被交遊而時亨命屯道泰身否成名踰于一紀

旅宦過于十年恩舊彫零路岐悽愴薦禰衡之表空出人
間嘲揚子之書僅盈天下去年遠從桂海來返玉京無文
通半頃之田乏元亮數間之屋隘傭蝸舍危託燕巢春晚
將遊則蕙蘭絕徑秋庭欲掃則霜露霑衣免調天官獲昇
甸壤歸惟却掃出則卑趨仰燕路以長懷望梁園而結慮
尚書道光士範德冠民宗愷悌之化旣流鎮靜之功方懋
竊思上國投刺東都及門惟交抵掌之談遂辱知心之契
載惟浮泛頻涉光陰豈期咫尺之書終訪蓬蒿之宅感義
增氣懷仁識歸便當焚遊趙之簞毀入秦之屨束書投筆

仰副嘉招謁謝未閒下情無任感戀之至謹啟

上尚書范陽公第二啟

某啟某猥以謏聞仰承嘉命處囊引喻未施下客之能在
握稱珍遂忝上卿之列循揣斯久兢惶不任况尚書學總
百家術窮三畧文鋒筆力抉揚馬之懸門劒氣弓聲割韓
彭之右地永言賓畫宜在民宗豈意非才旋蒙過聽未至
居右旣乏相如之譽後來在上終興汲黯之嗟手足分榮
里閭交慶行吟花幕卧想金臺未離紫陌之塵已夢清淮
之月依仁佩德白首知歸伏惟俯賜恩察謹啟

上尚書范陽公第三啟

某啟絹若干右特蒙仁恩賜備行李謹依數捧領訖嘉命猥臨厚資仍及捉襟見肘免類於前哲裂裳裹踵無取於昔人感佩私恩不知所喻謹啟

獻侍郎鉅鹿公啟

某啟今月某日舍弟新及第進士義叟處伏見侍郎所制春闈放榜後寄呈在朝同年兼簡新及第諸先輩五言四韻詩一首夫元黃備采者繡之用清越爲樂者玉之奇固以慮合元機運清俗累陟降於四始之際優游於六義之

中竊計前時承榮內署柏臺侍宴熊館從畋式以風騷仰
陪天籟動沛中之舊老駭汾水之佳人非首義於論思實
終篇於潤色光傳樂錄道煥詩家况屬詞之工言志爲最
自魯毛兆軌蘇李揚聲代有遺音時無絕響雖古今異制
而律呂同歸我朝以來此道尤盛皆陷於偏巧罕或兼材
枕石漱流則尚於枯槁寂寥之句攀鱗附翼則先於驕奢
豔佚之篇推李杜則怨刺居多效沈宋則綺靡爲甚至於
秉無私之刀尺立莫測之門墻自非託於降神安可定夫
衆制伏惟閣下比其餘力廓此大中足使同寮盡懷博我

不知學者誰可起予某比興非工韻蒙有素然早聞長者
之論夙託詞人之末淹翔下位欣託知音抃賀之誠翰墨
無寄况乎仲氏實預諸生榮沾洙泗之風高列偃商之位
仰惟厚德願沐餘輝輒慶鄙詞上攀清唱聞郢中之白雪
媿列千人止齊日之黃門慙非八米千冒尊重伏用兢惶
其詩五言二首謹封如別

獻華州周大夫十三丈啟

大夫以南陽惠化爲東雍先聲旬日之來謳歌已洽今者
北誅雜虜西却諸戎蓮岳分憂雖期於河潤雲臺佇議終

動於天慈伏料卽時必降徵詔某方從羈宦遠遠深恩昔
日及門預三千之弟子今晨卽路隔百二之關河瞻望清
光不任攀結

謝鄧州周舍人啟

伏奉榮示兼賜及腰褥靴裁具酒筒蓋杓匙筯等捧戴感
激不知所爲伏念仰辱恩光嘗多違遠風波結恨臯壤銜
誠始邂逅於江津又差池於門宇遞蒙厚賜以重離憂文
革錦茵終成虛飾杯杓七筯誰與爲歡孤燭扁舟寒更永
夜迴腸延首書不盡言伏計亦賜信察

獻舍人彭城公啟

某啟卽日補闕令狐子直顧及伏話恩憐猥加庸陋惶惕
所至感結仍深某長於邱樊早慙師友雖乏許靖幹時之
材其實懷殷浩當世之心機而運與願乖言將俗背一邱
一壑遠媿於幽棲十辟二徵近慙於籍甚已迫地勢屬此
門衰藐念流離莫或遑息喬木空在弊廬已頽遂與時人
俱爲歲貢三試於宗伯始忝一名三選於天官方階九品
俸微五斗病滿十旬李陵空卷勇而無益陳平裸體美亦
何爲方今聖政維新朝綱大舉徵伊臯爲輔佐用褒向以

論思大室澆風廓開雅道縲囚爲學重見程生掌囿受經
復開晁子沉淪者延頸逃散者動心是敢竊假非詞仰干
哲匠果蒙咳唾以及泥塗王遜之遙舉董聰方斯未逮蔡
邕之出迎王粲與此非同得水可期搏風有望坐生羽翼
平視煙霄儻或不悛鑄人必令附驥雖不足深窺閭奧遠
及幾微然比於鼠識吉凶驚知戊巳旣殊異類蓋有深誠
延望光雲尚隔仙路伏紙魂動濡毫氣增伏願始終念察

獻舍人河東公啟

某啟前月十日輒以舊文一軸上獻卽日補闕令狐子直

至伏知猥賜披閱今日重於令狐君處伏奉二十三日榮
示特迺尊嚴曲加褒飾捧緘伸紙終慙且驚某本乏英華
且無聲采雖成書有託而爲裘未工重以迫於世資窘此
家素管寧木榻坐已膝穿孔仍緼袍行而肘見然猶開卷
獨得懸頭自強韋編鐵搥屢聞斷折亡書墜冊麤識篇題
而投足多難寫誠無所舉非高第仕怯上農虞寄爲官何
嘗滿秩王華處世寧願異人況在下寮獨無誰語一至於
此欲罷不能每念大漢之興好文爲最悅洞簫之製則諷
在後庭美子虛之文則恨不同世然猶揚雄以草元見誚

馬卿亦用貲爲郎何賓賓之紛綸而名義之乖爽況乎志
異數子事非當時司寇棲棲反歎爲幸嗇夫喋喋誰爲非
賢又安可坐榮於寒谷之中自致於剛氣之上矧灰籬難
駐圭管無停若使蜀臣之九考不移漢郎之三朝莫過人
嘲染鬢帶憤減圍卽葛洪命述永處跛驢之伍田光精竭
必爲駑馬所先伊秀銳之旣衰亦銚穎之都盡方今外無
戰伐內富英賢閣下文爲世師行爲人範廓至公之路優
接下之誠是願竊望門闥仰干闥侍果蒙旌異特損緘題
夫收掌上之妍者在假之長袖騁櫪中之駿者必資於坦

金定全居二 卷二十一 二
塗然後可求其宛轉之能責其滅沒之功是當延望實在
深誠倘蒙一使御車與之下座雖不足丹青時輩領袖諸
生冀獲預於游談庶少賢於博奕伏惟念錄謹啟

端午日上所知劍啟

商隱啟五金鑄衛形威邪神劍一口銀裝漆鞘紫錦囊盛
傳自道流頗同古製未遇良工之鑒常爲下客所彈龍藻
雖繁鞞膏稍薄敢因五日仰續千齡厠玉玦于君侯擬象
環于夫子所冀更蒙千灌重許三卿使武士讓鋒佞臣喪
魄無荆王之遇敵手以麾城有漢相之策勲腰而上殿嘉

辰祝願平日禱祠伏惟恩憐特賜容納謹啟

端午日上所知衣服啟

商隱啟右件衣服等弄杼多疎級鉞未至浼李固之奇表
累王衍之神鋒敢恃深恩竊陳善祝伏願永延松壽常慶
蕤賓遠比趙公三十六年當國近同郭令二十四考中書
肝膈所藏神明是聽仰塵尊重實用兢惶謹啟

爲濮陽公涇原署營田副使賓牒

員外簪笏傳芳珪璋挺秀蘊請纓之壯志擅夢筆之雄才
諷于後庭賦推麗則試于前殿策號賢良猶以有感一言

從來三揖卑棲嶺表遠蹈海隅綿歷四周往還萬里洎節旄移所省閣將歸永懷求舊之誠尚鬱圖南之勢且爲邦猶聞乎去食制敵難曠于運籌兼仗折衝是資談笑諸葛亮意在蔣琬果以成功趙莊子善彼藥書竟能集事旣見君子竊慕古人幸當屈以求伸無惜翔而後集事須請攝節度副使

爲濮陽公補保定尉張鴟巡官牒

前件官卑棲州縣富有文辭過蘭成射策之年誠思屈跡當陸展染髭之日難議折腰屬賓榻方施使車旁午假其

候館聊免沒階事須差攝館驛巡官仍立行隨副使行軍
已下

爲濮陽公陳許補王琛衙前兵馬使牒

牒奉處分我之偏裨琛最夙舊且思往歲嘗從孤軍衣偏
裒之衣靡求盡飾掌維婁之事未始告勞晚節彌堅壯心
不改土田漸廣士卒逾多念此老成豈令新問事須補充
衙前兵馬使

爲濮陽公補盧處恭牒

右件官家承禮訓學隸樂章屬陳國東門古多長袖楚王

下邑俗漸南音將陳饗客之儀兼切移風之雅其謹防三
惑無奪八音杜濮水之遺聲絕吳宮之竊笑勿驕予官事
須補充樂營使

爲濮陽公補仇坦牒

牒奉處分昔坦綺紈主吾筆劄二紀相失一朝來歸惜其
平生老在書計今重之侯國亦有私朝豈無他人不可同
日舉爲列校合屬連營尚有藉于專精俾兼司于稽勾事
須補充散兵馬使兼勾節度觀察兩使案

爲濮陽公補顧思言牒

右件官山棲自高基品無敵空縱爛柯之思未逢睹邵之時以其勢協爭雄事同攻昧易局中之急劫佐麾下之權謀事須補充州衙推方將對局寧在沒階仍宴集不用公服趨走

爲滎陽公桂州署防禦等官牒

段協律

判官稟訓台階從知侯國庭蘭並馥巖電齊明且憶菲才嘗分曩顧梁園辱召淮館陪遊今者獲守小藩適經舊地茲川之上方顧慕于廉堂穀水之旁亦徘徊于既曲實欣

餘慶豈謂嘉招願持謙下之姿俯贊訓齊之令事須請攝防禦巡官

李幼章

前件官籍在五陵學通三畧不露才而務進能仗氣以逾恭所宜率彼紀綱記爲親信屬資封部稍遠宸居是用輟自私朝仍其舊邸遠分尺籍遙押牙璋爾其敏以在公幹而集事達封章于鳳闕底方賄于蠻圻勿替前勞以承後弊事須補充防禦押衙知上都進奏

羅瞻

前件官早從官序實負公才每服節以存誠亦約言而顧
禮惟是造次不敢尤違今者位重察廉務煩按鞠旣資明
練兼藉哀矜勿輕東海之寃無縱梗陽之畧俾夫縣道畏
我簡書事須充觀察衙推

陳公瑾

右件官學精三畧藝極六鈞敏以竄疑謀恭而仗氣事予
莊主奉我郡侯誰言越嶺之名藩仍自梁園之下客旣叨
防遏深藉材能將致果於戎行俾同登于勇爵事須補充
同散兵馬使

崔兵曹

兵曹出于華胄早履宦途卻宛直而和大叔美而秀能暇
豫于恩義不造次以違仁盤錯有彰腎肯無頓雖思濡足
安可折腰希茂象賢之能兼佐宣風之職事須請攝觀察
巡官兼知某縣事

段球

右件官太倉稟術何宴傳能既通九歲之宜兼善五禽之
戲湘南越北蠻落華人雖其土厚水深豈忘二臣三佐勉
將剖浣用息痼瘕勿矜麥麴之庾辭審辯藿茶之輟寐事

須補充醫博士

鄉貢明經陶標

牒奉處分昔漢時高手周室上醫將崇三代之功亦謹一經之遺以標實稱幹父且又名家佇有濟于瘁痾在先頒于祿廩爾其精詳桐籙憤疑別農經且繫孝廉之船勉用李孫之石事須補充要籍

前攝臨桂縣令李文儼

右件官我李本枝諸劉貴族能彰美錦令肅陽鰲臨桂既有正言豐水方思健令無辭久假勉慰一同已聞言偃之

絃歌更佇潘仁之桃李事須差攝豐水縣令

突將凌綽

牒奉處分我所羈縻未爲遐陋旣懸版籍實集賦輿言念
蕃州雖無漢守豈得久容懦吏有負疲人以綽早處中軍
嘗爲突騎旣負抉門之武仍聞免胄之恭是用暫假撫綏
聊資控遏爾其載敷仁勇式慰州邦無挾遠以生情勿憂
貧而易操獎能舉罪兩不敢私事須差知蕃州事

盧韜

右件官族茂燕臺譽高藩閫末從鵬化聊屈鸞棲州縣誠

歎于徒勞煙火嘗欣其相接勉全素分佇振嘉聲事須差
攝靈川縣主簿

林君霈

牒奉處分古者三人擇師一社立宰所冀稟規有自制事
無偏雖在邊隅且分州里語地旣踰于一社料民何啻于
三人將求綏撫之才必極柔良之選以君霈策名麾下厯
軼軍前身弓六鈞心鐵百鍊無擎跽曲拳之志有飲冰食
蘗之貞是用輟自私門介于廉部勉承委寄慎保始終有
祿食以獎能有簡書而謫過惟茲二道汝自執焉事須差

知環州事

李克勤

右件官始在宦途便彰政述瓊枝瑤萼且異于良倫黃綬
青袍尚淹於末路屬吾屬縣有令曠官芒屨旣蠹于良材
碩鼠又妨于嘉穗匪聞讓畔遽致盈庭聿求可人用革前
弊其在推公以分疆理潔已以抑奸豪使麻不爭池桑無
競隴蔣琬沉醉未如巫馬之戴星王衍清談豈若韓稜之
去電勉修實効勿徇虛名苟善否之有聞于賞罰而何怯
事須差攝修仁縣令

韋重

右件官頃佐一門實揚二職襲韋賢之經術有崔寔之鬚
眉久爲旅人不遇知己今龍城屬部象縣分封雖求瘼頒
條允歸于通守而提綱舉轄必藉于外臺子其正色當官
潔身照物逢柔莫如有蠹必攻羅含擅譽于琳瑯猶聞謙
受梁竦徒勞於州縣未日通材勿耻上官以渝清節事須
差攝柳州錄事參軍

曹讜

牒奉處分郡督郵縣主簿古之任重今也材難得其人則

四隣無侵刻之虞失其人則一府壞紀綱之要昭邱舊郡
平樂屬城雖州將在焉而縣尹耄矣苟忘管轄何寄準繩
前件官實富公才嘗參侯服削大刀而只思髓髀茂長材
而惟憶風霜辯瀉口河志堅心石委之稽勾必慰疲羸夫
專于雷同則無以貴吾道苟務從派別則無以致人和允
執厥中唯理所在無愆潔操以負求才事須差攝昭州錄
事參軍

陳積中

牒奉處分地處一同有移風易俗之務雷震百里有驚遠

懼邇之威聿求其人良不易得况荔江屬邑桂嶺通津停
弦待調鋪錦俟製前件官秩爲仙尉名下蘇卿聊借效于
牛刀暫輟遊于鷺翎勉將廉白以慰逋遺事須攝荔浦縣
令

李遇

牒奉處分使君代緒清華襟神秀朗恭而負氣勇以求仁
屢試絃歌比分符竹處雞舌龍身之地不侮鰥寡居明珠
大貝之間益清冰蘖每聞受代便至徒行戰勝紛華儀形
暇豫比陶潛之乏食遠過二旬方江革之歸資兼無一舸

爰徵舊史想見其人某幸忝廉車每懷屬部詎忘賢守薦
自良朋敢滯蠻圻同頒鳳詔噫處盤錯而願彰利刃虞升
卿是以爲能有民人而遂不讀書仲子路于焉見矩疑盛
名典郡學古入官苟直操之罔渝豈層臺之足累勉思所
自以保克終事須請攝嚴州刺史

呂詔

牒奉處分前件官吏道長材故人令弟一言相託萬里爰
來未及解巾俄悲斷手牙絃載絕徐劍寧欺且資典午之
權終正頒條之請佇揚仁隱用慰疲羸無恃舊故事須差

攝判官

秦軻

牒奉處分廉介不潤于脂膏忠信可行於蠻貊不唯今也
古猶難哉予始輟廉車軻素爲州將召至與語得其可人
書劍有成腰腹甚偉是用返于故部慰彼遐陬職次牙璋
務兼銀冶俯資軍用兼助地征雖處之不疑將委爾以山
澤之利而義然後取不蓄爾爲聚斂之臣其在無失舊規
不踰素節威小人之草咸使偃風護姤女之神無令得火
竹聞集事更議酬勞事須假同兵馬使職依前知古州事

兼專勾當都蒙營務

劉福

牒奉處分前件官襲慶儒門儲精吏道不鋤庖刃思處囊
雖今廉部之初求人是切爰將折獄用寄長材子其斟酌
蜀科評詳漢令勿令門下意盜壁于張儀無使獄中溺然
灰于安國佇觀法理更俟甄昇事須差攝觀察衙推